

**BOSNA I HERCEGOVINA
FEDERACIJA BOSNE I HERCEGOVINE
FEDERALNA AGENCIJA ZA UPRAVLJANJE ODUZETOM IMOVINOM**

PRAVILNIK

**o sticanju statusa edukatora iz područja finansijskih istraga i oduzimanja
imovinske koristi pribavljene krivičnim djelom**

Sarajevo, oktobar 2023. godine

Na osnovu člana 66., a u vezi sa članom 60. stav (3) Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05), te čl. 28., 30. stav (1) tačka c. i 31. tačka I. Zakona o oduzimanju nezakonito stečene imovine krivičnim djelom ("Službene novine Federacije BiH", broj 71/14), direktor Federalne agencije za upravljanje oduzetom imovinom donosi

PRAVILNIK

o sticanju statusa edukatora iz područja finansijskih istraga i oduzimanja imovinske koristi pribavljene krivičnim djelom

POGLAVLJE I. OPĆE ODREDBE

Član 1. (Načela)

Federalna agencija za upravljanje oduzetom imovinom (u daljem tekstu: Agencija) uređuje i provodi postupke u vezi stručne edukacije, odnosno obuke državnih i policijskih službenika i nosilaca pravosudnih funkcija u vezi sa finansijskim istragama i oduzimanjem imovinske koristi pribavljene krivičnim djelom vodeći se načelima propisanim Zakonom o budžetima u Federaciji Bosne i Hercegovine („Službene novine FBiH“, broj 102/13, 9/14, 13/14, 8/15, 91/15, 102/15, 104/16, 5/18, 11/19 i 99/19), Zakonom o finansijskom upravljanju i kontroli u javnom sektoru u Federaciji Bosne i Hercegovine („Službene novine FBiH“, broj 38/16) i Standardima interne kontrole u javnom sektoru u Federaciji Bosne i Hercegovine („Službene novine FBiH“, broj 75/16), naročito načelima transparentnosti i ekonomičnosti, te se shodno navedenom donosi ovaj pravilnik.

Član 2. (Predmet)

Ovim pravilnikom uređuju se način, uslovi i kriteriji za sticanje statusa edukatora iz područja finansijskih istraga i oduzimanja imovinske koristi pribavljene krivičnim djelom (u daljem tekstu: Edukator), javni poziv, postupak selekcije i izbora, sačinjavanje Liste edukatora (u daljem tekstu: Lista), angažman, naknade i druga međusobna prava i obveze.

Člana 3. (Definicije)

Pojmovi korišteni u ovom pravilniku imaju sljedeće značenje:

- a) Edukator je lice koje se angažira za pripremu i neposredno provođenje edukacije.

- b) Edukacija je stručna obuka iz područja finansijskih istraga i oduzimanja imovinske koristi pribavljene krivičnim djelom, a provodi se putem predavanja, seminara, konferencija, stručno-edukativnih skupova, okruglih stolova i sl., a koju Agencija organizuje samostalno ili u saradnji sa drugim institucijama.

POGLAVLJE II. SELEKCIJA EDUKATORA

Član 4. (Postupak selekcije i izbora edukatora)

Postupak selekcije i izbora edukatora vrši Agencija putem javnog poziva.

Član 5. (Javni poziv i prijava za sticanje statusa edukatora)

- (1) Agencija objavljuje trajni javni poziv za sticanje statusa edukatora.
- (2) Direktor Agencije donosi odluku o sadržaju javnog poziva.
- (3) Javni poziv iz stava (1) ovog člana objavljuje se na internet stranici Agencije i trajno je dostupan svim zainteresovanim licima koji ispunjavaju uslove iz ovog pravilnika.
- (4) Javni poziv obavezno sadrži: način podnošenja prijave, listu oblasti, spisak neophodne dokumentacije koja se podnosi uz prijavu, način obavještanja kandidata o statusu njihove prijave, te druge potrebne podatke i informacije.
- (5) Jedan kandidat može po javnom pozivu da podnese prijavu za najviše tri oblasti.

Član 6. (Uslovi za sticanje statusa edukatora)

Status edukatora mogu steći sudije i tužioci imenovani u skladu sa Zakonom o Visokom sudskom i tužilačkom vijeću Bosne i Hercegovine, zatim akademsko osoblje univerziteta, ovlaštena službena lica – eksperti za pojedine oblasti zaposleni u državnim organima (uključujući i pravosudne institucije) i drugim organizacijama, agencijama za provođenje zakona i nevladinim organizacijama, advokati, notari, kao i ostali pravni i drugi stručnjaci u vezi sa finansijskim istragama i oduzimanjem imovinske koristi pribavljene krivičnim djelom.

Član 7. (Lista edukatora)

- (1) Listu edukatora utvrđuje direktor Agencije na prijedlog organizacione jedinice (sektora) Agencije nadležnog za vršenje poslova edukacije, i to za sljedeće oblasti:
 1. Krivičnopravna oblast,
 2. Građanskopravna oblast – uža oblast: stvarno pravo, obligaciono pravo, izvršni postupak,

3. Oblast privrednog i finansijskog prava,
 4. Oblast ekonomskih nauka,
 5. Oblast kriminalističkih nauka,
 6. Druge oblasti koje se mogu dovesti u direktnu vezu sa finansijskim istragama i oduzimanjem imovinske koristi pribavljene krivičnim djelom.
- (2) Lista se objavljuje na web stranici Agencije i obavezno sadrži: ime i prezime, te naziv oblasti.
 - (3) Lista se dopunjuje i ažurira u skladu sa odobrenim sticanjem statusa edukatora od strane Agencije.

POGLAVLJE III. ANGAŽMAN I ISPLATA NAKNADA

Član 8. (Angažman edukatora)

- (1) Agencija angažuje izabrane edukatore sa Liste.
- (2) Izuzetno, Agencija može angažovati i druga lica za realizaciju edukacije iz oblasti iz člana 7. ovog pravilnika, pod uslovom da ispunjavaju kriterije iz člana 6. ovog Pravilnika.
- (3) Agencija može angažovati i međunarodne eksperte za provođenje edukacija iz oblasti iz člana 7. ovog pravilnika.
- (4) Direktor Agencije može vršiti funkciju edukatora, odnosno može angažovati i uposlenike Agencije za vršenje funkcije edukatora pod uslovom da navedeni poslovi nisu propisani pravilnikom o unutrašnjoj organizaciji.
- (5) Direktor Agencija nema pravo na naknadu za vršenje funkcije edukatora.
- (6) Edukatori iz st. (1) do (4) ovog člana u toku jedne kalendarske godine mogu biti angažovani najviše 5 (pet) puta.
- (7) Izuzetno, edukatori u toku jedne kalendarske godine mogu biti angažovani i više od 5 (pet) puta, pod uslovom da je isto neophodno kako bi se učesnicima edukacija prezentovala određena nova praksa i slučajevi od izuzetne važnosti za oblast finansijskih istraga i oduzimanja imovinske koristi pribavljene krivičnim djelom.

Član 9. (Naknade za angažman edukatora)

- (1) Edukatorima pripada naknada za angažman.
- (2) Direktor Agencije će posebnom odlukom propisati kriterije za iznos naknade za angažman edukatora.
- (3) Naknade za angažman edukatora isplaćuje se na osnovu zaključenog ugovora o autorskom djelu.
- (4) Ugovorom o autorskom djelu bliže se uređuju svi elementi od značaja za realizaciju konkretne edukativne aktivnosti.

Član 10.
(Naknade za troškove prijevoza)

- (1) Agencija snosi edukatorima troškove prijevoza koji se obračunavaju u visini stvarno plaćene karte ili u visini 15% cijene litre benzina BMB 95 na teritoriji Bosne i Hercegovine, po pređenom kilometru najkraće udaljenosti.
- (2) Agencija ne snosi edukatorima troškove prijevoza ukoliko je mjesto izvođenja događaja udaljeno manje od 30 km od mjesta prebavišta edukatora.
- (3) Edukatorima on-line programa ne pripada naknada za prijevoz.
- (4) Edukatorima kojima Agencija obezbijedi prijevoz ne pripada naknada za prijevoz.
- (5) Međunarodni eksperti angažovani kao edukatori imaju pravo na troškove prijevoza u visini cijene avionske karte.

POGLAVLJE IV. MEĐUSOBNA PRAVA I OBAVEZE

Član 11.
(Prava i obaveze Agencije)

- (1) Agencija je u obavezi da kontaktira edukatora, najkasnije 15 dana prije dana termina održavanja edukacije. Izuzetno, zbog hitnosti, edukatori mogu biti kontaktirani i u kraćem roku.
- (2) Agencija je obavezna da uputi edukatora u vezi izrade radnog materijala.
- (3) Agencija može nesmetano koristiti ustupljeno autorsko djelo koji je predmet ugovorenih odnosa.
- (4) Agencija je u obavezi da samostalno ili u saradnji sa suorganizatorom prati rad edukatora tokom izvođenja edukacije i da obavijesti edukatora o rezultatima evaluacije održane edukacije.

Član 12.
(Prava i obaveze edukatora)

- (1) Edukator ima pravo da mu se osiguraju prostorni i tehnički uslovi za izvođenje učioničkih edukativnih programa kao i tehničku podršku tokom izvođenja online edukativnih programa.
- (2) Edukator ima pravo na naknadu prema zaključenom ugovoru o autorskom djelu između Agencije kao naručioca usluge i edukatora kao izvršioca usluge.
- (3) Edukator je u obavezi da obezbijedi interaktivan pristup nastavi, u skladu sa andragoškim principima podučavanja odraslih i odgovoran je za tačnost prenesenih informacija tokom realizacije programa.
- (4) Edukator je u obavezi da preuzete obaveze obavlja u skladu sa najvišim standardima pravosudne obuke i stručnog usavršavanja i uz poštivanje etičkih kodeksa i standarda struke u pravosudnom sistemu Bosne i Hercegovine.

(5) Rad edukatora mora biti kolegijalan što podrazumijeva da tokom trajanja angažmana mora kombinovati različite potrebe, koordinirati različite ideje, jedni od drugih primati savjete u vezi sa iskustvima, graditi sinergiju između edukatora, polaznika, te stručnim i administrativnim osobljem Agencije.

(6) U slučaju opravdane spriječenosti, edukator je dužan da odmah obavijesti Agenciju, najkasnije 5 (pet) radnih dana prije održavanja edukacije.

(7) Edukator je u obavezi da u periodu od 15 dana od dana održane edukacije, putem e-maila ili na drugi odgovarajući način, odgovori na upite od strane polaznika edukacije u vezi prezentovane teme, posredstvom Agencije.

(8) U slučaju da edukator ne postupi po obavezi iz st. (7) i (8) ovog člana, isto predstavlja osnov da izgubi status izabranog edukatora, a odluku o navedenom donosi direktor Agencije.

Član 13.

(Ocjena uspješnosti realiziranog programa edukacije)

(1) Ocjena rada angažiranog edukatora vrednuje se na skali od jedan do pet, na osnovu Upitnika o evaluaciji koji popunjavaju učesnici na kraju održane edukacije, a koji je anonimn.

(2) Agencija može u vršenju evaluacije koristiti dokumente i materijale suorganizatora edukacije, pod uslovom da isti u velikoj mjeri ne odstupaju od upitnika iz stava (1) ovog člana.

(3) Edukatoru koji jednom bude ocijenjen ocjenom nižom od tri, direktor Agencije može donijeti odluku o gubitku statusa izabranog edukatora.

(4) Sadržaj upitnika iz stava (1) ovog člana propisat će direktor posebnom odlukom.

Član 14.

(Nadzor nad provođenjem edukacije)

(1) Agencija obezbjeđuje tehničku podršku, organizaciju i uslove za održavanje edukacije.

(2) Praćenje rada edukacije, Agencija obezbjeđuje ušješćem lica uposlenih u Agenciji na poslovima iz nadležnosti Agencije za vršenje poslova edukacije.

(3) Uposlenik Agencije iz stava (2) ovog člana sačinjava izvještaj o svakoj pojedinoj edukaciji i isti dostavlja direktoru Agencije.

Član 15.

(Zaključci, mišljenja i preporuke u vezi pravnih propisa)

(1) Agencija obezbjeđuje da se zaključci, mišljenja i preporuke date i usvojene u toku realizacije edukacija, a koje se odnose na zakone i druge propise, dostave nadležnim organima i tijelima na daljnje razmatranje.

(2) Agencija može zaključke, preporuke i mišljenja iz stava (1) ovog člana koristiti i prilikom izrade propisa iz nadležnosti Agencije, odnosno propisa koje usvajaju

druga tijela i organi, a u čijem postupku se Agencije pojavljuje kao obrađivač propisa.

POGLAVLJE V. PRIJELAZNE I ZAVRŠNE ODREDBE

Član 16. (Upotreba rodno osjetljivog jezika)

Riječi koje se koriste u ovom pravilniku u jednom rodu (muškom ili ženskom) odnose se na oba spola.

Član 17. (Status postojećih edukatora)

Lica koja su do stupanja na snagu ovog pravilnika stekla status edukatora Agencije po bilo kojem osnovu, zadržavaju stečeni status i nastavljaju da provode, odnosno realiziraju edukacije na kojima su angažirani od strane Agencije, dok ne budu izabrani i upisani na Listu u skladu sa odredbama ovog pravilnika, a najkasnije do 31.12.2023. godine.

Član 18. (Prestanak važenja)

Danom stupanja na snagu ovog pravilnika prestaje da važi Pravilnik o kategorijama, izboru, pravima i obavezama edukatora Federalne agencije za upravljanje oduzetom imovinom za edukaciju državnih službenika i nosilaca pravosudnih funkcija, kao i drugih učesnika u postupku oduzimanja nezakonito stečene imovine krivičnim djelom u Federaciji Bosne i Hercegovine broj: 01-34-31/22 od 15.01.2022. godine.

Član 19. (Stupanje na snagu)

Ovaj pravilnik stupa na snagu danom donošenja.

Broj: 01-02-478/23
Sarajevo, 06.10.2023. godine

Izradio: B.Č.
Kontrolisao: A.Z.

